

THADOU BAPTIST ASSOCIATION KIPHUDOH THUSIM

Thadoute lah'a Christianity ahunglutna pat Thadou Baptist Association hung pendoh geihi kum 60 tobang alutne.¹ Atila chu Manipur pumpi hi Association khatna ana kivaipo ahi. Hinlah phat chomkhat jouva nam le paova hung kikhena, nam jouse le pao jousen ama ama Association cheh ahin neidoh ahi.

Kuki Baptist Association kiphudoh

Atil chun Manipur'a Baptist hohi Association thumin in ana kihom khenin ahi.² North-Western Baptist Association sunga um nam ni – Kuki & Naga - kah'a 1947 kuma kihet themto louna aumtah jehchun, kum ni jou, 1949 kumchun Kukihon Tujangvaichong muna amin beijin khoppi ana mangun, hiche muna chun Association tum nei dingin ahung kilol lha taove.

Association kiphudoh nading chun Satkhosei Thangeo, Seilen Hangsing, Otkhosei Haokip, Tongkhopao Ngoilu, Mangkhohen, Palal Lhouvum chule Lenjahao Malneo'in sum phabepbep ahin tohkhumun, Seikholet Singson chu lhalo Rs. 40/- toh Evangelist-cum-Organiser dingin asoldoh taovin ahi. Akingansena bangchun Seikholet'in jong Kuki houbungho achonsoh'in, Association tum kiphudoh nadingin organized abol letai.

Hitichun, 1950 kumbul lamin South Changoubung vangkho'a kikhopna aneijun, Kukite changtuma ding Association, 'Kuki Christian Association' (KCA) chu ana phutdoh taovin ahi. Thusim sun adangho jousen 1955 kuma MBC re-organized akibola chu KCA chu Kuki Baptist Association (KBA) ti'a hung kikhela, Manipur Baptist Association No. 5 hung kiti ahi tin asun sohkeijun ahi. Hinlah Seikholet'in vang "Hiche Changoubung kikhopna'a chun John Anderson tenupa ahung lhonin, 'Kukihon Association naphudoh dingu ahileh ABM'in jong evangelistic natohna lampanga lhaseh'a kithopina peuvinge ati lhonjeh'a, Baptist Houbung kiloikhom ma akihile, Kuki Christian Association dinga kilolha sa chu Kuki Baptist Association joh hidinga anikho mama a kiphat sahna kinei ahi" ati.

Association lamkai masapenho chu: Chairman, S.L. Palal (chomkhat jouvin S.L. Lunneh'in akhelpai tai); Field Secretary, Tongkhhohao Hangsing; Field Evangelist, Seikholet Singson; Treasurer Tongkthohang; Pastors, Pakho Sitlhou leh Tongkhopao Ngailut ahivue. Hitichun Kangpokpi'a cheng Songneh Lhouvum inn chu office din bahara'in ana laovin, KBA chu ahung kitolpan tai.

KBA chu gam le Office beija hitheilou ahijeh chu Seikholet Singson (Field Evangelist) le S.L. Lunneh (Chairman) 'in V. Sundaram (Deputy Commissioner of Manipur) henga gam agathum lhonin ahileh Sundaram'in jong Motbung muna Government gam acres 17½ chu Mission Compound din ana pen ahi. Hichun office chu Kangpokpi muna konin Motbung muna ahung kichontai.

Seikholet Singson MBC Executive Secretary dinga appoint ahung kibola, CBCNEI Executive Member ahunghi chun KBA chu MBC le CBCNEI 'in recognised abolna din pan ahin latan ahi. 1955 kum mama'in MBC le CBCNEI 'in KBA chu Manipur Baptist Association (MBA) No. 5 dingin recognised ana bolin, American Baptist Foreign Mission Society (ABFMS) 'injong CBCNEI through'in KBA chu Rs. 12,000/- in ana kithopi'in ahi. Hiche sum chu mangchan Association'in Office ding pucca building khat, adang danga manchah ding semi pucca building khat, Bible School ding RCC building khat ana lamdoh'in ahi.

¹ Tujangvaichong Houbung chu U.M. Fox khutna Karong le Maram muna twilut mi 22 ho, chuleh August 30, 1914'a U.M. Fox khut mama'a Ukhrol muna twi analut nupa thum (Lhingkhosei Kipgen le aloinu Chonghoi, Let-am Kipgen le aloinu Chinthem, chuleh Vumjaseh leh Phakim) member hina'a ana kiphut doh'a ahi.

² 1. North East Baptist Association. Association khatna chu North East Baptist Association (NEBAM) tin akiminvon ahi. Hichehi Ukhrol gamkai ahin, atamjo chu Tangkhul Houbung ahin Thadou Houbung phabep jong ajaovin ahi. 2. Sadar Baptist Association. Sadar Baptist Association tin akiminvon ahi. Hiche Association sunga jao tribeho chu Kom, Thadou leh Thangal Naga ahivue. 3. North-West Baptist Association. Hiche Association'in ahop tribeho chu Rongmei, Liangmei, Kom, Thadou, Zemei, Paumei chule Chiru ahivue.

MBC'a kon recognition akimu jouvin Mangkho Thomsong chu Director masapen dinga lhendoh ahin, Paokhosem chu clerk, chuleh pastorho chu: Pakho Sitlhou, Tongkhopao Ngailut, Lungkhohen Misao, Songjalun, Henkhosei Lhangum, Songkhopao Mangte and Tongkhohen Lhoujem ahieve.

North East Kuki Baptist Association (NEKBAM) Kiphudoh

North East Kuki Baptist Association (NEKBAM) chu North East Baptist Association (NEBAM) sunga um Kuki houbung phudoh ahi. NEBAM sunga hi Tangkhul Naga le Thadou Kuki kigom khom ahivun, hinlah Tangkhulho chu atamjoh jeh'un kikhopna jouse chu Tangkhul pao jeng ahin mangcha pan taovin ahile Thadou pao thoho ding chun het ahahsa tan ahi. Hijehchun Ukhrul gamkai sunga chu Kuki Houbung 50-60 kikh le member 8000 chunglam um ahijeh chun Kuki Baptist Houbung lamkaihon Association tum phudoh nadin pan ahinlaovin, 1955 kumin North-East Kuki Baptist Association Manipur (NEKBAM) chu ahin phudoh taovin ahi. NEKBAM chu 1957 kumin MBC in MBA No. 6 dingin recognised abolin, CBCNEI 'injong hetpehna aneito lhonchun ABFMS 'a konin Rs. 12,000/- CBCNEI khutna konin kithopina anapeuvin ahi. Hiche sum chu mangchan Association chun Phaicham (Yaingangpokpi) muna gam ana cho vin, NEKBAM centre din ana mangun ahi.

MBC le CBCNEI'in 1971 kumchun Association Number'a kihop chu ahin sumang lhonin, Associationho chu ama ama tribe mincheh pu'a akiminvo thei dingun phalna ahin pelhontan ahileh MBA No. 6 chun T. Wakotphai Baptist Church muna 1971 chun kikhopna aneijun, NEKBAM, MBA No. 6 ti'a kihe chu Chongthu Baptist Association (Ch.BA) tin aminvo taovin ahi. Hitichun 2005 kum chu Ch.BA in Golden Jubilee ana mang tan ahi.

KUKI BAPTIST CONVENTION KIPHUDOH

The Kuki Baptist Convention (KBC) hi Tujangwaichong muna March 16, 1958 kuma KBA le NEKBAM kigoma phudoh anahi. Eastern Theological College, Jorhat, Principal D.F. Duffy chun CBCNEI kikhopna'a Baptize member 1000 valcheh nei Association nga semdoh thei koitobang nam aumleh pao dungjuija Convention asemthei dingin ana podoh'in ahi. Hiche hi Missionaryhon asum'utoh Manipur adalhad nunguleh achama amaho kenga adin theina dinguva kigong ahi. Hiche thuhi MBC Executive Secretary le CBCNEI Executive Committee Member anahi'a Seikholet Singson'in Kuki Houbung lamkaiho henga ana polut nin, KBA le NEKBAM lamkai hon hiche tobang chanvou hi alhaso louna diuvin ana hetsah'in ahi.

Hitichun alangto'a lamkai hon ama ama Association cheh kikhopna ana gongun, KBA lamkaiho chu Kangchup IB muna ana kikhomun, alangkhatna NEKBAM lamkaiho chu Zalenbung Houbung muna ana kikhomun ahi. Association teni phasah dungjuijin KBA le NEKBAM 'injong Tujangwaichong Baptist Church muna March 15-16, 1958 sunga toukhomna ana neijun, kum 1958, March 16 nikhon 'Kuki Baptist Convention' (KBC) chu ana phudoh'un ahi.

Hitolhon chun Association teni nei le gou jouse chu KBC nei le gou ahung hitan, KBA centre, Motbung chu KBC administrative office din ana mangun, Phaicham muna um NEKBAM centre chu Ngulhao mina kivo, kumni sung Thadou paova Bible simna Bible School 'Ngulhao Memorial Bible School' (NMBS) din ana mangun ahi. KBC triennial Conference masapen chu Keithelmanbi muna March 5-8, 1959 sungin ana kimangin ahi.

KBC lamkai masapenho chu: Sutkai Chongloi, President; Tongkhojang Lunkim, Executive Secretary; Mangkho Thomsong, Treasurer; Paokhosem Kholhou, Clerk; Tongkhojam Baite, Chowkidar ahieve.

KUKI BAPTIST ASSOCIATION KISUHHING KIT

Kuki Baptist Convention chu KBA le NEKBAM kigoma phudoh anahi vangchun hiche kipumkhatna chu anasot joupon, 1967 kumchun KBC chu ana kisumangin, Kuki Baptist Association chu athah'a chohing ahikit tan ahi. KBA avella kijopkit lona jehho chu:

i. Mission Centre Phaicham Thu'a Boina

Association ni'in KBC aphudoh'a chu KBA Mission Compound Motbung chu KBC Office'a neiding, chuleh NEKBAM Mission Compound Phaicham chu Bible School'a man dinga ana kiphatsah'u ahi. Hinlah KBC 'in Ngulhao Memorial Bible School chu Phaicham muna kona Motbung muna chondoh ding ahin gotnuva, ahin chondoh phatnun NEKBAM'a ana umsa Phaicham le akimvela Houbungho chu alunghangun, hijeh chun 1965 kumchun KBC'a kona haina lekha asepmun, NEKBAM chu athah'in achohing kit taovin ahi. KBA'a kon apotdoh'u goh hilouvin agamu leh KBC centre Motbung muna ana pehlutsao anei agou jouseu jong akinung lahkit taove.

ii. Pao Thu'a Boina

Seikholet'in "Pao thu'a boina masapen hi 1965 kuma Phaicham Bible School'a oja ni kinel na'a kona hung kipana, khonunga houbung kipunkhom jong ahin suhkeh ahi" ati. Tahbeh'in kum 1967 'a kon chun KBC sunga Thadou le Kuki kah'a kihet themto louna chu nasatah'in ahung kipane. KBC hung kiphudoh'a patchun Tongkhojang Lunkim hin Thadou pao hi Kuki pao ti dingin ahin masot jing jengin; hitichun KBC sunga lamkai phabep jong athunun tolhon chun Thadou hi kintah'a Kuki'a kheldoh dingin nasatah'in pan ana laovin ahi. Hiche hin mitamtah asulung phamon, houbung khantouna asutangin, lhagao mangthai pohnatna le evangelist natoh nalampang alhasuh'in, Thadou hi Kuki'a kheldoh ding chu alungtup pipenu anasoh doh tan ahi.

Bible hin vannoi Christiante jouse akipumkhat sah ahi. Hinlah Thadou paova Bible kiledoh hin tahsa le lhagao lam agoma kikkena ason ahi. Ngulhao'in ana le 1942 kuma ana kithenso New Testament chu Thadou Kuki ana kiti ahi. Hinlah Tongkhojang'in Thadou paova ale Holy Bible chu "Kuki Reference Edition/Holy Bible in Kuki" tin aminvon ahi. Hiche hin pao chung changa kihetkhelna nasatah'in asousang sah'in, court case chan gei ana anakibolin, hitolhon chun Kuki Bible ti'a ki print Bible hopdoh ahilouna dinga court'in akham dingin ngehna ana kibolin ahi. Hijehchun "Kuki Reference Edition" Holy Bible hi Manipur'a thenso ana hithei tapon, hijehchun Nagaland Molvom muna June 20, 1971 'in thenso anahitai. Hitia pao chung changa boina chu akhose chehcheh'a, suhlhap thei ahilou phatna MBA No. 5 chun KBA ajop kit ahitai.

iii. Motbung Centre Thu'a Boina

KBC kiphudoh'a chu Motbung Mission Centre chu Head Office'a man dinga Association ni chu ana kinopto lhona ahi. Ahin phatchomkhat jouvin lamkai phabepmin Head Office jong Motbung'a kon Imphal'a chonding lungtup ahin neitaove. Achung chona Kuki Christian Council (KCC)³ ahung kiphudoh chun KBC nei le gou (KBA nei le gou) atamjo chu KCC office Imphal muna tollut ahin, chuleh KBC

³ KCC (Kuki Christian Council) chu Christian Literature lampang, adeh'a Labu le Bible kiledohna lampanga pan lahkhom nadinga ana kiphutdoh ahi. Hiche kiloikhomna'a hin Kuki Houbungho'a kon Denomination jouse: Presbyterian Mission, Halflong, Cachar District, Assam; Baptist Mission, Nagaland, Manipur le Burma; North East India General Mission noija um KCA (ECA); chule Methodist Mission, Burma ana pangun ahi. Hinlah pao chung change boina jeh chun 'Council' chu August 13, 1966, 12:00 pm 'in President Khupzagou Singson'in akisubei tai tin phondohna ana neitan ahi. (Declaration of the Dissolution of KCC on 13/8/1966, Notification order, circulated by President Khupzagou Singson). Council chu Bible ledohna dingle Labu kibang neina dinga Kuki Houbung jousen "Kuki Christian Council" ti'a ana phudoh'u ahivang chun; April 8, 1979 kumchun Chalva Houbung muna 'Council' chu "Kuki Christian Church" tin ana khelun, Denomination chom khatnin tuni geihin aumdoh tan ahi. Thongkholal Haokip, "Kuki Churches Unification Movements" *Journal of North East India Studies* Vol. 2/1 (July - December 2012), 39.

Accountant jong KCC office muna akikoi tai. Hiche jong hon KBC sunga kihet khelna nasatah aso sah'in, akhona KBA kisuh hing kit lo ahi.

iv. KBC 'a kon NEKBAM Pot

Association teni chu amani chama kigellha'a pan lakhom nadinga KBC anaphudoh lhon ahi. Ijenti'a akigomkhom Association teni khatjoh sangin alung ahin hei kitna ahileh a'member hina akilahdoh theina dinga thaneina bulhing setna anei ahin, hitobang chu ahung sodoh'a ahileh Convention chu kisumang kit tina hija ahi. Phaicham gam thu'a kiboina jehchun NEKBAM'in KBC'a kon a'member hina chu 1965 kumin ana kinung lahdoh kit tan, NEKBAM chu athah'in ana choh hing kittan, MBC'in jong avelin MBA No. 6 hikit dingin January 5, 1967 kumin recognised abol kit tan ahi.

v. Danpi Kisumang/Keh

KBC danpi'a KBC suhmang thei nading article jong apange. Hichu akigomkhom memberho hop thuma hopni'in aphatsah'a ahileh hithei ahi. Ahin danpi'a kipelou lamtah'in NEKBAM chu KBC'a kon apotnin, MBC henga hetpehna ana thumtai. Hiti'a NEKBAM KBC'a kona apot hin danpi asuhmang/asuhkeh ahitai. KBC'a kon NEKBAM apot tah jeh chun danpi chu amang/akeh tan, Association khat sehseh chun convention chu abolthei ahilou jeh chun, NEKBAM apotna chu KBC chu beija, akidalhaho chu KBA mama'a umkit ahitai.

vi. KBA Kisuhhing kit

KBA suhging kit ding thu'a kikhopna masapen chu August 2, 1967 kuma ana umi ahi. Hiche nikho'a ki passed resolutionho chu:

Resolution No. 1. KBC chu Christa lenggam chalna dinga dei umtah'a ana kisemdoh ahi. Ana chekkel khapoi, ana kisumo khapoi, NEKBAM to ikigop uva KBC iti maimaiju bou ahi. Kivaipohna ineihou lah'a semphat na jopkit dia dei umpen chu KBA hi ahi.

Resolution No. 2. KBC chu NEKBAM toh kigom'a KBC kisah'a amani kigopna'a kivaipohna dia Constitution kismet ahi. Ahin akinungle kit uva Date 5/1/1967 ni'a MBCC hon Association No. 6 ti'a NEKBAM chu ahinsah kit tahjeh'u chun Constitution akehtan, Constitution ke kiti chu KBC aumtapoi tina ahi. NEKBAM akile tahjeh chun KBA jong achoma umkit ahitai.

Resolution No. 3. April 3, 1964 nikhon KBC lamkai ho MBC office'a acheuvin 250/- agapeuve. Hiche'in avetsah chu KBC chu MBA No. 5 bou hija ahi. KBC chu Convention akiti vanga Associationho to kibanga sim ahin, KBA bouchu KBC kiti maimai bou ahi. Chuleh CBCNEI 'in KBC leh NEKBAM chu chanvou kibangin ahop peh kitnin ahi. Hiche'in avetsah chu: KBC le NEKBAM chu kibang ahi. Polanga Convention ti'a akihet vanga asunga chu Association No. 5 bou hija ahita.

Resolution No. 4. KBC le KCC hi lhagao lam kiloikhomna hitalouvin political organisation danin aumdoh tai. Changval lhagao huhhing ding sangin member amoh pun ding adeisah'un, amaho loupina ding jeng angaito taove. Hijeh chun Kipana thupha lhangsap ahitheina dingin Evangelistic Association neilou akhoh tan, hijeh'a chu KBA hi suhging kit dinga pha ahi.

KBA chun avel'in August 22-24, 1967 sungin kikhopna anei kitnun ahi. Kuki Baptist Association, MBA No. 5 aki jopkit tai ti'a phondohna chu noiya hin akitah lange. (Declaration for the continuation of KBA):

KBA No. 5 jopkit ding kitihi Christa'a Sopi tamtah'in ana jopvah theihih jongleh Pathen mitmu'a thildih khat ahijeh hintin, Chista lenggam chalna ding dei Houbung phabep, lunggel them Houbung upa chuleh lekha them phabep'in KBA No. 5 jopkit dinghi thudih ahi tin ahin hetaovin, hijeh chun tuni Date 23/8/1967 (vahchanni) nin Pu Henkholem Meeting Chairman'in adei Houbungtho thalhengin Pakai Jesu minin KBA No. 5 hi akijop kit'a ahitai tin kaphondoh tai.

Gam chungchang thu'a,

KBA No. 5 gam thu'a Motbung mun'a um Centre hi Field Director Pu Mangkho Thomsong B.Th mina ana um ahi. KBA thilkeo ahijeh'in gamchu mikhat mina umlou thei ahilou jeh chun Pu Mangkho Thomsong min'in Patta chu

ana umin ahi. Hijeh chun agam chu KBA No. 5 gam ahi. Akijop kit'a pat KBA in alokit ding ahi. KBA No. 5 property ho jouse chu KBA kijop kitna pat ama (KBA) lechan kit ahitai.

KBA le NEKBAM chun August 19, 1970 nikhon KBC suhmangna ding leh nei le gou ho chung chang thu'a kikhopna anei kitnun ahi. Hiche nikho'a nei le gou chungchang thu'a kilolna phabepho chu:

Resolution No. 4. Achatloh theilou nei le gouho – Gam, Centre Building le adang dang, chuleh achatloh thei nei le gouho – furniture, meivah, machine, papers, documents, Pathen thu hileh leilam thu hile MBA No. 5 leh MBA No. 6 lekhabuho publish kibol leh kibollou - athaneina noi lhona umding jouse chu gamle go ahin building ahin abona MBA No. 5 le MBA No. 6 'in alokit ahitai.

Chuleh Pu T. Lunkim le akiloipi hon jong akhutnuva um KBA le NEKBAM lekhabo jouse ama ama Association cheh'a ahin pehlut dinguva ngehna kinei ahi.

Resolution No. 5. Achunga kisei KBA le NEKBAM nei le gouho chung a lam louva hung kikuma ahiloule hinchu'a aumle dan dihlouva chon (unwarranted and illegal) 'a kisim ding ahi.

Hiti'a chu Kuki Baptist Association athah'a kijop/kisuhing kitna, Manipur Baptist Convention'in jong December 15, 1970 nikho'a chu MBC, MBA No. 5 ahina chu apom kit ahitai.

Athah'a kijopkit KBA lamkai masapenho chu: President: Hemkholen Sitlhou; Vice President: Ashong Singsit; General Secretary: Thangkhochon Thomsong; Organiser: Jamkhomang Kipgen leh Thangkhopao Sitlhou; Evangelist: Helien Kipgen le Kimpao Singsit; Central Bible Institute: Head Master: Mangkho G.Th, Jangkhohun C.Th, Asst. Teacher leh Helien Kipgen Diploma, Asst. Tacher; Clerk: Paokhosem leh Chowkider: Jamkhohao.

Hiche akilhengdoh thahho hin September 1, 1967 nikho'a patna atohpat kitnu ahitai. Chuleh Taloulong kho'a um Pu Luhen chu Aimol Project Evangelist din 1968 kumin appoint ana kibolben ahi.

KBA Executive Central Committee dinga August 23, 1967 nikho'a appoint kibolho chu: Henkholen, Asong Singsit, Sokhup, Pastor Keithelmanbi; Thangkhopao, Pastor Motbung; Lunhen, Pastor Taloulong; Letkhoseh, Imphal; Thangkhochon, Imphal; Paokhosem, Motbung; Mangkho Thomsong, Seimang, Head Master; Tongkhothang, Asst. Teacher; Vumkam, Ranger; Helien Kipgen, Youth Promoter; Jammang, Pastor Haipi; chuleh Sehlim, Pastor Zalenphai ahiuve.

KUKI BAPTIST ASSOCIATION MIN KIKHEL

Thadou Baptist Association ti'a aki minvo

Kuki Baptist Association chu Kuki nampi noiya um tribe tampi kigom khoma ana kisma ahi. Manipur sunga Christianity ahung machal chehcheh phat chun tribe jouse ama ama tribe dungjuja Association semthei dingin ahung pilhing gam taovin ahi. Chujongleh KBA sunga chun tribe chungchang thu'a kilungkhat louna jong ana umin; hijehchun phabep'in KBA ana dalhaovin organisation thah aphutdoh'un ahi. Hitichu akhonnann KBA, MBA No. 5 chu Thadouho bou ahung hitai.

Chujongleh hiche phat laitah chun MBC leh CBCNEI 'in jong number dungjuja Association kihop chu ahin sumang lhonin, a tribe min dungjujuva Association akiminvo thei diuvin phalna ahin pelhontan ahi. Chumaleh KBA sunga chu Thadouho bou uma ahitah jehchun a tribe'u minpu'a Association semding lung ahin vul taovin ahi.

Hijehchun, September 28 – October 1, 1971 sunga Haipi Houbung muna General Assembly'a chun ana seikhomun; September 30, 1971 nikho chun KBA houbung'ho'a kon thalhenga kikhom member cheng chun lungkhat tah'in Kuki Baptist Association (KBA) chu Thadou Baptist Association (TBA) tin akhel taovin ahi. Rev. Helien Kipgen chu TBA Field secretary masapen dinga lhendoh anahi. Kuki Baptist Association, Thadou Baptist Association tia akikhel hi Manipur Baptist Convention of Churches vide Resolution No. 16, Sl. No. 1 of 53rd MBCC Assembly, dated: Imphal, the 3rd December, 1971 chun approve ana boltai.

Conclusion:

Hichu ahileh TBA hin Golden Jubilee iman diu hilouva, Golden Jubilee ikhel'uva tu'a hi Diamond Jubilee iman diu joh ahitai. Chongthu Baptist Churches Association atilla NEKBAM ana kiti chun bon 1955 akiphudoh kumu chu alah uva 2005 kuma Golden Jubilee aman tah'ule TBA, atilla KBA ti'a 1951 kuma kiphudoh chun 1951 chu kiphudoh kuma imanuva 2021 kum joh leh Diamond Jubilee iman diu ahitai. 1971 kumhi iminu ikhel kumun, Reform ikibol kumu joh ahin, kiphudoh kuma kisim thei lou ahi.

Ijem ti'a 1971 kum chu kiphudoh/established kuma isimuva ahileh tu'a eikisei nao banga gam le go, in le lou neilou ihu ahin; KBC gam hi pumhatna ilah tah beh'uva, KBC property le manchah jouse ilah peh'u hija ahi. Guhchat lahchat le hunama kiphudoh ihu ahin, Pathen thu le la toh kitoh louhel ahi.

Thusim kicheh neilou mite chu Nam khangtou lou ti a kihe ahi. Eihon vang thusim kicheh tah ineiju ahin, Hinlah eihon iki sut khel jeh'uva akhangtoulou, alhasam, chapang cha dana iumdoh'u ahi. Thadou-Kuki te lah'a dinga Association masapen ihu ahin, abul abal thusim ihet chet lou jeh'un mi noise'in ium doh'un, eiho jeng jong neochan iki ngaito un ahi. Tu hi imutna kona khah doh phat chu ahitai. Itouphao igamu hi eiho KBA/TBA a ahin, koima gam chudoh leh lahpeh ihi pouve. Thusim isemtoh'u leh ima jouse chu adih sa hija ahi.